

**Namminersornerullutik Oqartussani, Kommuninilu nunatsinni tjestemandit pillugit Inatsisartut Inatsisaata § 55-ip imm.1-ip allangortinneqarnissaanut tunngasumik nalunaarusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut nunatsinni tjestemandit, danskit naalagaaffiata nunatsinni tjestemandinut malittarisassai malillugit tjestemandit soraarnerussutisiaqalersinnaaleqqullugit, taamaattorli tapeqartitsisoqassalluni soraarnerussutisiaqaataasussanit aningaasarsianinngaanniit %-mik aaliangersimasumik angissusilikkamik, taamaaliornikkut nunatsinni, qallunaat nunaannilu tjestemandit soraarnerussutisiaqarnikkut assigiinngissutaasup nalimmassarneqarnissaa anguniarneqassalluni. Naligiinngissutaasoq nalimmassarniarlugu, tapeqaataasussap qanoq annertutiginissaa aammalu kommuninut, namminersorlutillu oqartussanut qanoq aningaasatigut naleqassanersoq nalunaarusiami UKA25 sioqqullugu tunniunneqartussami ersarissarneqassaaq. Tamatumungattaq ilanngullugu nunatsinni qassit, tjestemandinut isumaqatigiissut naapertorlugu atorfinitsinneqarsimanersut nalunaarusiami ersarissarneqassaaq.**

(Inatsisartunut ilaasortaq Peter Olsen, Inuit Ataqatigiit)

## **Akissuteqaat**

### **Siullermeerinninneq**

Siunnersuummut qujanaq.

Naalakkersuisut aallaqqaasiullugu, Danmarkimi nunatsinnilu Tjestemandinut atugassarititat assigiiaartuunissaannik qulakkeerinninniarluni suliaq aallartereersoq oqaatigissavaat. Danmarkimi Medarbejder- og Kompetencestyrelsi Danmarkimi, nunatsinni Savalimmiunilu naalagaaffimmi atorfeqartunut atugassarititat naligiinngissannaannik aalajangerneq atuutilersinniarlugu suliamik aallartitserenera, suliami killiffiuvoq. Styrelsi suliaq nunatsinni naalagaaffimmi atorfilinnut atuutilersinneqassasoq anguniagaraa. Tamanna Naalakkersuisut sukkanerusumik ingerlanneqarsinnaanera Naalakkersuisut soorunami kissaatiginartikkaluarpaa, naalagaaffimmi oqariartuut tusaatissatut tiguneqarpoq.

Siunnersuuteqartumit oqaatigineqareersut, IMAK tjestemandinut soraarnernut atugassarititat pillugit nalunaarusiorpoq. Naalakkersuisut nalunaarusiaq soqutigalugu atuarpaat, immikkoortormi Naalakkersuisunut annertuumik pingaaruteqarpoq.

Naalakkersuisulli Inatsisartut nalunaarusiamut pineqartumut pissutsit arlallit attuumassuteqartut eqqummariffigisariaqaraat, isumaqarput. Nalunaarusiaq inuit arfinillit pillugit paasissutissat tunngavigalugit suliarineqarpoq. Taamaalilluni misissuineq atugassarititanik tamanik ersersitsisuunanilu annertuujunngilaq. Tamatuma saniatigut

nalunaarutip akileraarutiniq utoqqalinermilu soraarnerussutisianik samminninnera ajoraluartumik immikkoortumi inerniliinissamat piviusorsioortumik tunngavissiiingilaq.

Nalunaarusiamik pineqartumik suliaqarneq Naalakkersuisut iluaraat, peqatigisaanilli Naalakkersuisut aamma nalunaarusiaq pisariaqartumik paasissutissinneqarluni aalajangernissamat naammattumik tunngaviliinngitsoq erseqqissartariaqarpaat.

Soorunami nunatsinni Danmarkimilu tjenestemandit soraarnerussutisiaasa assigiinnginnerat qularutissaanngilaq. Naalakkersuisut paarlakaattut arlallit pissutsit taakku naalagaaffimmut saqqummiuttarpaat, soorlutaaq suliaq Folketingimi oqallisigineqarluni. Nunatsinni Danmarkimilu aningaasarsiat assigiinnginnerat, assigiinngissutinut tunngaviusumik nassuiaatissaavoq. Taamaalilluni ukiut soraarnerussutisiaqalerfiit, aningaasarsiani inissisimaffik imaluunniit skalatrini soraarninngornermi inissisimaffik soraarnerussutisiat annertussusaannut aalajangiisuupput. Tjenestemanditut soraarnerussutisiat nunami najugarisami tjenestemanditut aningaasarsiat ineriartornerannik malinnittarnera, tamatuma sukumiisumik kinguneraa. Tjenestemandinut immikkoortoq nunatsinni Danmarkimilu aningaasarsiat assigiinngiffituarinngilaat. Tamanna aamma ilinniarsimanngitsunut, ilinniagartuunut il.il. aamma atuuppoq. Naalakkersuisut tamatumani assigiinngisitsinertaqassanngitsoq isumaqatigaat, taamaammallu qallunaat naalakkersuisuinut suliaq pillugu saaffiginnissallutik.

Naalakkersuisut aamma pingaartippaat soraarnerussutisiaqartitsinermit immikkoortoq tamarmi nutaanik annertuunik suliniutinik pilersaarusiornermi ataqatigiiffiit, tassani utoqqalinermit soraarnerussutisianut, tjenestemandit soraarnerussutisiaannut immikkoortumi kiisalu soraarnerussutisiaqarnissamat aaqqissuussinermit pinngitsoorani ilaasussaataaneq ilanngullugit eqqummaariffigineqartariaqarnerat. Aaqqissuusseqqinnerit annertuut innuttaasut pilersaarusiorsinnaanerannut tamatumanilu pisariaqartitaannut annertuumik kinguneqarsinnaapput, soorlu ungasissumut isumannaakkamik aningaasaqarnikkullu attanneqarsinnaasumik pisortat soraarnerussutisiaqarnermit aaqqissuussaat.

Naalakkersuisut nunatta naalagaaffimmi sulisuusimasunut soraarnerussutisianut tapinut aningaasartuuteqarnissaa, isumaqatiginagu aamma erseqqissartariaqarpaat. Naalakkersuisut tjenestemandinut soraarnerussutisiaqartitsineq naalagaaffiup kisimi oqartussaaffigigaa, eqqaasitsissutigissavaat. Tamanna nunatsinni Namminersorlutik Oqartussat naalagaaffik sinnerlugu, naalagaaffiup siusinnerusukkut nunami maani sulisorisimasaanut tjenestemanditut soraarnerussutisianik akiliisarnermik aqutsineratigut allanngortinneqanngilaq. Tjenestemandit soraarnerussutisiaasa saniatigut tapiineq, tjenestemanditut soraarnerussutisiallit nunatsinni soraarnerussutisiallit allanit, tjenestemandiunngitsunit aningaasatigut pitsaanerujussuarmik atugassaqartitsinermit malitseqarsinnaavoq. Nunatsinni soraarnerussutisiallinnut taamatut assigiinngisitsumik pinnittoqalernissaa Naalakkersuisut kissaatiginngilaat.

Suliaq allartereersoq eqqarsaatigalugu, Naalakkersuisut taamaalillutik siunnersuuteqartup siunnersuutigisaatut nalunaarusiornissaa naapertuussorinngilaat.

Naalakkersuisulli aamma immikkoortumi ilisimasaqarnerulersitsinissamik pisariaqartitsisoqarnera akueraat, tamannalu IMAK-ip nalunaarusiaanut siunnersuuteqartullu anguniagaanut naapertuuppoq. Naalakkersuisut taamaalillutik allannguutissatut siunnersuut aqquutigalugu nassuiaammut sinaakkutit annertusineqarnissaat, suliallu ataatsimut isiginnittumik suliarineqarnissaa kissaatigaat.

Pissutsit piviusut pitsaanerusemik qulaajarnissaat siunertaralugu, taamaalillutik Naalakkersuisut allannguutissatut siunnersuut ima allaqqasoq saqqummiuppaat:

***“Tjenestemanditsinnut aaqquissuussinermi oqaluttuarisaanermi patsisinik nassuiaammik Naalakkersuisut suliaqarnissaat pillugu Inatsisartuni aalajangiiffigisassatut siunnersuut. Nassuiaammi qallunaat kalaallilu inatsisaat kiisalu tjenestemandinut immikkoortumi allaffissornikkut periutsit oqaluttuarisaanermi maannakkullu atuuttunik isiginnilluni nalilersorneqassapput. Tamatuma saniatigut naalagaaffiup nunatsinni atorfilittarisimasaanut tjenestemandit soraarnerussutisianik Kalaallit Nunaata Danmarkillu akornanni assigiissaariniarluni suliniutit aallartereersut, naammassinnittuunersut nassuiaammi nalilersorneqassaaq, taamaattoqarsimangippallu aaqquissutissatullu siunnersuutinik saqqummiussilluni. Nassuiaat UKA2025-mi tunniunneqassaaq.”***

Inernissamat piffissaliusseq siusinnerusinnaangilaq, suliarimi naalagaaffiup Medarbejder- og kompetencestyrelsimi suliaq aallartitaa taaneqartoq sioqqullugu inerneqarsinnaassanngimmat.

Tamanna tunngavigalugu Naalakkersuisut sinnerlugit Naalakkersuisut allannguutissatut siunnersuutit saqqummiussaata akuersissutigineqarnissaa inassutigaaara.